

VENDIM
Nr. 235, datë 20.12.2019

**MBI FILLIMIN E PROCEDURËS PËR MIRATIMIN E “STRATEGJISË PËR
INFRASTRUKTURAT KRITIKE NË SEKTORIN E ENERGJISË ELEKTRIKE”**

Në mbështetje të nenit 16 dhe nenit 18, të ligjit nr. 43/2015 “Për sektorin e energjisë elektrike”, i ndryshuar; ligjit nr. 2/2017 “Për sigurinë kibernetike” dhe VKM-së nr. 222, datë 26.4.2018 “Për miratimin e listës së infrastrukturës kritike dhe informacionit dhe të listës së infrastrukturës të rëndësishme të informacionit”, neneve 15 dhe 26 të “Rregullores së organizimit, funksionimit dhe procedurave të ERE-s”, miratuar me vendimin nr. 96, datë 17.6.2016; Bordi i ERE-s, në mbledhjen e tij të datës 20.12.2019, mbasi shqyrtoi relacionin me nr. 119/3 prot., datë 18.12.2019 “Mbi fillimin e procedurës për miratimin e ‘Strategjisë për infrastrukturat kritike në sektorin e energjisë elektrike’”, konstatoi se:

- Në Korrik të vitit 2016, Bashkimi Evropian ka miratuar direktivën nr. 2016/1148 “Mbi sigurinë e sistemit dhe sistemeve informatike” (NIS), e njohur ndryshe dhe si direktiva mbi “Cybersecurity”.

- Pas miratimit të rezolutës nga Kuvendi i Shqipërisë “Për vlerësimin e veprimtarisë së Entit Rregullator të Energjisë për vitin 2018”, ndër të tjera, në këtë rezolutë, ERE-s i është kërkuar të punojë për hartimin e një strategjie për infrastrukturat kritike në sektorin e energjisë në përputhje me direktivën e BE-së “Mbi sigurinë e sistemit dhe sistemeve informatike”.

- Në përmbushje të detyrave të lëna në rezolutën e Kuvendit, sipas nenit 18, të ligjit nr. 43/2015 “Për sektorin e energjisë elektrike”, i ndryshuar; ligjit nr. 2/2017 “Për sigurinë kibernetike” dhe VKM-së nr. 222, datë 26.4.2018, “Për miratimin e listës së infrastrukturave kritike të informacionit dhe të listës së infrastrukturave të rëndësishme të informacionit”, ERE ka vijuar punën për hartimin e “Strategjisë për infrastrukturat kritike në sektorin e energjisë elektrike”.

- Zbatimi i direktivës së BE-së është i një rëndësie të veçantë për Komunitetin e Traktatit të Energjisë së Vendeve të Evropës Juglindore, pjesë e së cilës është dhe Shqipëria, prandaj nga ana e Sekretariatit të Energjisë janë duke u zhvilluar me rregullatorët dhe operatorët rajonalë, grupe pune për mbledhjen e informacioneve lidhur me masat e marra për zbatimin e kësaj direktive.

- Duke kuptuar rëndësinë e strategjisë së sigurisë së kibernetike, në kuadër të nismës së USAID-it me ndihmën e NARUC-ut së bashku me Komunitetin e Energjisë, është duke u punuar për përpilimin e “Strategjisë për infrastrukturat kritike në sektorin e energjisë elektrike”.

- Për përgatitjen e kësaj strategjie, OEIK (Operatorëve Ekonomikë të Infrastrukturave Kritike), u është kërkuar informacion lidhur me masat e marra në zbatim të direktivës 2016/1148, të Bashkimit Evropian “Mbi sigurinë e sistemit dhe sistemeve informatike”, për ruajtjen e të dhënave konfidenciale të klientëve, lidhur me implementimin e masave në këtë drejtim, si dhe çdo masë tjetër të marrë në lidhje me sigurinë e sistemeve informatike.

- Ligji nr. 2/2017 “Për sigurinë kibernetike”, neni 6, pika 2, Këshilli i Ministrave, me propozimin e ministrit përgjegjës, miraton listën e infrastrukturave kritike të informacionit dhe të infrastrukturave të rëndësishme të informacionit, e cila përditësohet të paktën një herë në dy vjet.

- “Infrastrukturat kritike të informacionit”, përbëjnë shtyllat kryesore për funksionimin e ekonomisë dhe shoqërisë dhe një sulm ose ndërprerje ndaj këtyre aseteve dhe shërbimeve do ndikojë në një pjesë të madhe të popullsisë.

- ERE i ka propozuar Ministrisë së Infrastrukturës dhe Energjisë, duke bërë me dije Autoritetin Kombëtar për Certifikimin Elektronik dhe Sigurinë Kibernetike, si dhe KESH sh.a., përditësimin e Listës së Infrastrukturave Kritike të Informacionit, duke përfshirë në listën e këtyre infrastrukturave dhe infrastrukturat e kompanisë publike të gjenerimit.

- Shoqëria KESH sh.a., menaxhon kaskadën e lumit Drin që është burimi kryesor i furnizimit me energji elektrike të vendit, mosfunksionimi i së cilës do të shkaktonte efekte financiare, dhe sigurie për vendin, ERE ka propozuar përditësimin e Listës së Infrastrukturave Kritike të Informacionit për sektorin e energjisë elektrike me shoqërinë KESH sh.a. (Korporata Elektroenergjetike Shqiptare) si një infrastrukturë e rëndësishme dhe tejet kritike, e cila zotëron, gjithashtu, sistemin SCADA.

- ERE ushtron funksionet rregullatore me qëllim promovimin e një tregu të brendshëm konkurrues të sigurt dhe miqësor ndaj mjedisit për të gjithë klientët dhe furnizuesit, duke siguruar kushtet e duhura për funksionimin e sigurt dhe të qëndrueshëm të rrjeteve të energjisë elektrike, në bashkëpunim të ngushtë me Komunitetin e Energjisë dhe autoritetet rregullatore të vendeve të tjera.

- Aktualisht Sekretariati i Komunitetit të Energjisë ka zhvilluar me rregullatorët dhe operatorët rajonalë grupe pune për mbledhjen e informacioneve lidhur me masat e marra për zbatimin e direktivës së sipërcituar.

- Qëllimi i këtij dokumenti është të përcaktojë rregullat dhe masat që duhet të ndërmerren nga operatorët e infrastrukturave kritike në sektorin e energjisë elektrike për rreziqet e shkëlqes apo dëmtimit të këtyre infrastrukturave në kuadër të operimit përmes platformave të ndryshme digjitale.

- “Strategjia për infrastrukturën kritike në sektorin e energjisë elektrike”, përcakton detyrimin e operatorëve që operojnë infrastrukturën kritike në sektorin e energjisë elektrike që të marrin masat e duhura gjatë projektimit, instalimit dhe funksionimit të rrjetit ose pajisjeve të përdorura prej tyre, në mënyrë që të garantojnë sigurinë, integritetin dhe funksionimin e qëndrueshëm të sistemit elektroenergjetik.

Për gjithë sa më sipër cituar, Bordi i ERE-s

VENDOSI:

1. Fillimin e procedurës për miratimin e “Strategjisë për infrastrukturën kritike në sektorin e energjisë elektrike”.

2. Drejtorja e Çështjeve Ligjore të njoftojë palët e interesuara për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim brenda 7 ditëve kalendarike, si dhe mund të bëhet ankimi në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti